

鮑夫人墓誌

十一郎可秀白頌

世之誌銘必假手於名公撰贊以大其譽聞以垂於
不朽秀思誌之名石者不過爲沒世之後恐遭亂遷
居不識墓址銘此石以證之也竊此石藏土中卽有
名公謚贊安得見之於人乎秀祖受周封於陳者
嬀滿也自陳遷齊者完也自齊遷楚封潁川侯者
軫也自潁川遷吳興者達也自吳興遷江州者
叔明也叔明乃南朝武帝之曾孫也江州卽今九江
府德化縣白鶴鄉泉水隴自此遷德安縣太平鄉者
旺也 旺六世孫崇公與弟端公同居共食七百

食口 端公事唐有封威烈將軍誥贈先世遂以
義聞僖宗旌表門閭昭宗元年封 崇公爲江州長
史贈光祿大夫宋太宗恩恤義門每歲貸粟以資之
食眞宗又賜御書誥封家長勅建祠堂慶厯四年詔
端公七世孫 競入朝賜御雀醇酒嘉祐七年以義
門丁繁奉旨分析各省州縣共計二百九十一莊派
定二百九十一人拈鬮分析我 端公昔鎮潭州義
門析分亦授是莊非 先祖之靈安得而恰分受之
痛哉 先考團公任參將諡侯爵八十二歲卒於京
葬紫金山有像傳祀夫人之第九者卽秀母也隨

先考仕京餘夫人俱居義門分莊遂遷此里前者八
母皆亡今則秀母棄塵夫 母也生長京都乃中書

鮑甯公之長女年二十五始配 先考育秀一身

母之操節松柏堅矢接下奉上怡氣順旨四時祭祀
之恭恪五服燕犒之饋餉未始一日而亡多爲宗族
所德訓厲諸子彌加勤篤秀等先仕於外今皆歸里
朝夕溫清 母益歡欣忽登仙境返駕瑤陵時年七
十四卜葬於花果園秀等拭淚作銘遺爲徵證銘曰
聰懿端慧婦道衷兮溫儉慈和家法隆兮訓導子輩
母儀崇兮壽考好德五福終兮花果之野遠山宮兮

右圖在長邑小吳門外明都一甲地名湖蹟渡譚家
大山燕子窩係三十六世漢清公字松樓針定丙山
壬向又三十七世本俊字東海公針定巽山乾向契
買譚質夫山地墳禁上從劉姓丈界外直五丈左從
劉姓界石下五丈橫直五丈四抵丈尺窖石爲界東
海公德配楊夫人針定乙山辛向續買譚質夫山地
上抵李界外直下二丈右抵熊姓丈界外左右二丈
四抵窖石爲界三人均葬此山其地山水環抱俯仰
觀瞻爰作歌曰行雲莽莽水溶溶四面山排翠幾重
正是牛眠占叶吉九原應笑說黃封